

17. LEGIONEN

Restitutionis depositi

(Ordinarius Legionen. – Congregatio pro Religiosis et Institutis Saecularibus)
(22 augusti 1987)

SPECIES FACTI. - In Monasterio Monialium OSB sic dicto 'de Vega', in dioecesi Vallisoletana sito, post bellum civile Hispanicum habebatur Communitas 16 Monialium OSB, quarum plus quam dimidia pars inhabilis erat ad vitam monasticam apte ducendam, alterae autem Moniales propter qualitatem personarum, propter defectum adsistentiae spiritualis necessariae necnon propter adversum animum partis vicum inhabitantium nullam amplius spem habebant vitae monasticae plene restaurandae. Quapropter Abbas Monasterii de Montserrat, D.nus Aurelius M. Escarré, officio Visitatoris Apostolici Monialium OSB in Hispania fungens, post diligens studium et diuturnas considerationes necnon obtento consensu unanimi Monialium dicti Monasterii de Vega, et insimul Monialium OSB Monasterii S. Crucis de Sahagún, in territorio dioecesis Legionensis constituto, atque consentientibus Ordinariis locorum utriusque dioecesis (Vallisoletae et Legionis), Sanctae Sedi proposuit, ut permetteret unionem extinctivam Monasterii de Vega cum Monasterio S. Crucis de Sahagún.

Sacra Congregatio pro Religiosis et Institutis Saecularibus die 13 septemboris anni 1958 decretum promulgavit quo petitam unionem extictivam concessit his sub condicionebus: 1.º Moniales Monasterii De Vega Superiorissae OSB Monasterii S. Crucis de Sahagún subesse tenentur. 2.º Bona Monasterii uniti bonis Monasterii unientis ceduntur cum facultate bona immobilia post unionem extictivam peractam alienandi, servatis de iure servandis et 3.º Moniales Monasterii uniti in eadem condicione et in iisdem iuribus censeantur esse quibus in propria communitate fruebantur.

Ast paulo post exsecutionem dicti decreti et paucis diebus post transmigrationem Monialium a Monasterio de Vega ad Monasterium de Sahagún peractam, domus communitatis de Vega incendio, probabiliter doloso, destruitur. Propterea alienatio boni immobilis communitatis extictae et in communitatem unientem versi non amplius pecuniam suppeditavit quae necessaria erat ad partem aedificii Monasterii de Sahagún restaurandam quae praecipue Monialium habitationi inserviebat.

Hac de causa et quia etiam hoc in loco adsistentia spiritualis necessaria defuit Antistita communitatis adiectae Monasterii de Sahagún de nova fundatione cogitabat, in dioecesi Zamorensi facienda, eum in finem, ut tota adiecta communitas 35 Monialium Monasterii OSB de Sahagún eo transferretur in novum adhuc exstruendum aedificium et in locum, ubi sacerdotalis cura abundatura sperabatur.

Episcopus Zamorensis libenter consensum erigendi novi Monasterii dedit. Episcopus Legionensis in transmigrationem partis Monialium in novam fundationem libenter consensit sed translationi totius communitatis S. Crucis in Dioecesim Zamorensem sese strenue opposuit.

Quapropter Decretum S. Congregationis de Religiosis et Institutis Saecularibus die 19 maii 1961 emissum vigore facultatum a Summo Pontifice concessarum et praehabito consensu Ordinarii loci sive dioecesis Legionensis sive dioecesis Zamorensis, facultatem tribuit deveniendi ad canonicam erectionem novi Monasterii Zamorensis Monialium OSB in quam pars Monialium Monasterii de Sahagún transmigrari possent sed cauto, ne hac de causa "ullo modo vigor vitae religiosae in monasterio originis enervetur neque eidem damnum oeconomicum inferatur".

De facto, maior pars Monialium Monasterii originis de Sahagún inter quas omnes de Monasterio unito de Vega provenientes, ad novum Monasterium de Ascensione Zamorensis transmearunt, una cum Antistita quae deinde Abbatissa novi Monasterii constituta est. Ipsa tamen in animo habuit obtinendi, favore temporis, ut sensim sine sensu totum Monasterium originis de facto absorberetur, quippe cum auctoritas ecclesiastica uti vidiimus hanc translationem completam statim faciendam prohibuisset.

Superior competens occasione translationis statuit, quaenam bona mobilia ex Monasterio originis ad Monasterium Zamorensis transferri possent eademque signo proprio in registro bonorum mobilium notavit. Magna pars istorum bonorum constabat iis bonis quae ex Monasterio de Vega proveniebant, cuius Moniales omnes ad novum Monasterium Zamorensis transmearunt.

IN IURE ET IN FACTO. - A) Haec facta necessarie praemittenda erant, ut quaestio iurium a nobis tractanda intellegatur.

In hac quaestione enim agitur de quibusdam bonis quae a Monasterio de Vega, per unionem suppresso, proveniebant. Abbatissa enim istius Monasterii initio anni 1946 ad Episcopum Dioecesis Legionensis misit quinque imagines in linteo pictas et unam tabulam pictam necnon quattuor libros chorales, ut in Archivo seu Musaeo Dioecesis interim constituto custodirentur, conservarentur et visitatoribus exponerentur. Paucos post menses etiam quinquaginta documenta membranacea ex archivio dicti Monasterii archivio Dioecesis Legionensis custodienda tradita sunt.

Dioecesis Legionensis Cancellarius documentum exaravit in quo fidem fecit de ipsis receptis bonis et expresse statuit proprietatem eorum ad Monasterium de Vega permanere et Dioecesim depositariam tantum esse. Ut renuntiatio venditionis ex parte Monasterii recognosceretur Episcopus Legionensis elemosynam mille libellarum hispanensium Monialibus donavit. Dioecesis postea documenta restauravit et in proprio catalogo descripsit.

Per unionem extinctivam inter Monasterium de Vega OSB et Monasterium S. Crucis de Sahagún OSB omnia bona illius huic tradita sunt ut ex Decreto unionisclare patet.

Sed de facto nemo amplius de ipsis bonis apud archivum Dioecesis depositis cogitabat neque in Registro rerum mobilium, de quo supra, notabantur, ideoque inter bona translatica occasione novae foundationis non apparuerunt. Anno tamen 1977, Abbatissa novi Monasterii, anno 1961 in civitate Zamorensi fundati, ad quod Moniales de Monasterio de Vega exstincto ex communitate Monasterii S. Crucis de Sahagún transmigratae erant, eorum restitutionem ab archivio dioecesano Legionensi expostulavit, quatenus bona essent ad novum Monasterium Zamorensis pertinentia.

Abbatissae postulanti restitutus Archivarius Legionensis coram S. Congregatione pro Clericis, quae rem competenti Congregationi pro Religiosis et Institutis Saecularibus transmisit. Archivario actori propter istius defectum iuris standi in iudicio se substituit Ordinarius loci Legionensis qui etiam post S. Congregationis pro Religiosis mandatum, tradendi scl. bona deposita Monasterio OSB Zamorensi, tamquam actor contra istam Congregationem causam prosecutus est quae

hodie nobis deiudicanda proponitur.

B) Primum documentum de iuribus, de quibus agitur, ab Antistita OSB Monasterii Zamorensis die 30 ianuarii 1978 exhibitum est. Refertur in hoc documento de sessione capitulari communis Monasterii de Sahagún eiusdem diei in qua unanimi voto proprietas legitima bonorum in tabulario Legionensi depositorum Monasterio Zamorensi attribuitur. In calce huius documenti exstat nota manu Secretarii illius temporis S. Congregationis de Religiosis die 21 decembris 1978 scripta, qua eadem Congregatio declarat illa documenta imaginesque a Monasterio de Vega provenientia constituere proprietatem communis Monialium OSB Zamorensis.

≤Tunc Custos Archivi ubi documenta deposita exstabant die 19 septembris recursum interposuit ad S. Congregationem pro Clericis, quae tamen die 10 octobris causam S. Congregationi pro Religiosis et Institutis Saecularibus remisit.

Haec tamen S. Congregatio die 28 februarii 1980 novo Episcopo Legionensi Decretum transmisit, quo definitive statuit proprietatem omnium bonorum quae anno 1946 a Monasterio OSB de Vega apud Archivum Dioecesis Legionensis deposita sunt, recognoscendam esse Monasterio OSB Zamorensi non obstante defectu notificationis explicitae in illa tabula, tunc ab auctoritate competenti approbato, omnium bonorum quae a Monasterio de Sahagún ad novum Monasterium Zamorensis transferenda erant. Statuit insuper contractum illius depositi vim habere inter Centrum Studiorum Dioecesis Legionensis et Monasterium OSB Zamorensis.

Contra hoc Decretum S. Congregationis pro Religiosis et Institutis Saecularibus Custos Archivi Legionensis recursum proposuit ad Sectionem Alteram huius Supremi Signaturae Apostolicae Tribunalis. Cum tamen hic Custos non haberet personam standi in iudicio, Ordinarius ipse Dioecesis Legionensis die 27 maii 1980 petivit sententiam definitivam de hac re iam nimio tempore agitata.

Patronis utriusque partis constitutis qui proprium defensionis votum exhibuerunt, itemque Promotore iustitiae in persona Rev.mi Patris Gangoiti, O.P., deputato qui suum quoque votum pro rei veritate exaravit cui Patroni responderunt, die 30 aprilis 1985 hoc Supremum Tribunal Decreto statuit, ut tentamen compositionis pacifica inter partes litigantes experiretur. Quod cum incassum evaserit Secretarius huius Tribunalis die 4 decembris 1985 decernit, ut ad ulteriora procedatur et die 10 decembris eiusdem anni in Sede Supremi Tribunalis dubium concordatum est sub formula: "An constet de violatione legis vel in procedendo vel in decernendo relate ad actum Congregationis pro Religiosis et Institutis Saecularibus dici 28 februarii 1980, prot.n.3332/60".

C) Nunc autem, ut de violatione legis necne vel in procedendo vel in decernendo in casu recte iudicari possit necesse est ut praeprimis constet de quanam lege vel de quoniam iure in casu nostro agatur.

Ut ex specie facti enarrata clare patet, quaestio fundamentalis est condicio iuridica inter litigantes circa obiectum litis. Absque dubio agitur de contractu depositi, quis scl. sit deponens et quis sit depositarius bonorum de quibus agitur et quaenam iura regant huiusmodi contractum.

Circa contractus sive ius veteris Codicis IC in can. 1529 sive ius novi Codicis IC in can. 1290 iisdem fere verbis canonizat ius civile territorii in quo contractus stipulatur. Quoad contractum depositi ius civile hispanicum certo certius applicandum est quod de hac re statuit:

Art. 1766 Codicis Civilis Hispanici dicit: "El depositario está obligado a guardar la cosa y restituirla, cuando le sea pedida, al depositante o a sus causahabientes o a la persona que hubiere sido designada en el contrato".

Art. 1777: "El Depósito debe ser restituido al depositante cuando lo reclame, aunque en el contrato se haya fijado un plazo o tiempo determinado para la devolución. Esta disposición no tendrá lugar cuando ... se haya notificado a éste la oposición de un tercero a la restitución de la cosa depositada".

Art. 1779: "El depositante está obligado a reembolsar al depositario los gastos que haya hecho para la conservación de la cosa depositada y a indemnizarle de todos los perjuicios que se le hayan seguido del depósito".

Secundum hanc legem canonizatam Depositarius noster i. e. Archivum Dioecesis Legionensis illa bona deposita restituere debet depositanti vel eius successori iuridico qui est in casu nostro, absque ullo dubio, Monasterium S. Crucis de Sahagún quod, ut supra vidimus, per unionem exstinctivam cum Monasterio de Vega omnia bona acquisivit, quae antea ad istud Monasterium pertinebant. Haec bona nec postea, occasione novae foundationis Monasterii Zamorensis ad hoc transierunt, quia in registro ab auctoritate competenti statuto bonorum quae a Monasterio originario ad Monasterium Zamorensense transferenda erant, haec bona deposita non exstabant neque implicite comprehendebantur cum ab auctoritate novam foundationem concedente expresse statutum sit Monasterium a quo i. e. de Sahagún nullum detrimentum oeconomicum ex nova foundatione pati debere et secundo, quia actus administrativus, quo occasione translationis partis communitatis ex originario ad novum Monasterium bona quae-dam mobilia ex titulo proprietatis vel donationis Monasterio Zamorensi concessa sunt, stricte interpretandus est secundum can. 50 veteris CIC et can. 36 novi CIC. Quod ergo expresse non conceditur, non comprehenditur in iure translationis.

Nec alio quodam titulo illa bona postea e patrimonio illius ad patrimonium istius translatata sunt, quia illa declaratio Communitatis Monasterii de Sahagún solummodo occasione litis, post 16 annos a tempore translationis, ideoque tempore suspecto et quasi fraudulenter facta est et numquam actum novae transmissionis patrimonii illorum bonorum constituit neque constituere potuit, cum indigeret, ratione qualitatis et pretii bonorum pro alienatione, permissione S. Sedis quae numquam qua talis postulata et ideo numquam reapse concessa est quia neque Monasterium ncque S. Congregatio pro Religiosis de ea cogitabat.

Mirum est omnino quod haec S. Congregatio in documentis de re nostra missis dicat ex actis in Congregatione existibus probationes habere, ex quibus ius patrimonii illarum rerum depositarum apud Monasterium Zamorensse esse cum reapse ex istis documentis potius contrarium eruitur.

Ex iure hispanicu de contractibus insuper patet (Art. cit. 1777) restitutionem depositi, quamvis a depositante postulata sit, non debere executioni mandari si communicata est oppositio tertii contra talem restitutionem.

Idem ius hispanicum insuper statuit (Art. 1779) depositantem depositario omnes expensas solvere debere, quas iste in conservatione depositi habuit et insuper omnia detrimenta a depositario passa huic resarciri debere.

Decretum S. Congregationis pro Religiosis et Institutis Saecularibus quod impugnatur ex triplici ergo capite contra legem egit: primo imponendo Depositario i. e. Ordinario loci Legionensi cessionem depositi Monasterio OSB Zamorensi faciendam, cum hoc Monasterium neque depositans neque eius legitimus successor fuisset. Secundo cum oppositio tertii i. e. Directoris Musaei contra restitutionem adesset et tertio quia nihil de obligationibus legalibus ex restitutione nascentibus in Decreto statuit.

Quibus omnibus, tum in iure tum in facto mature perpensis, Collegium Em. morum Patrum Cardinalium, pro Tribunal sedens ac solum Deum pree oculis habens, Christi nomine invocato, proposito dubio respondendum censuit uti respondet: "AFFIRMATIVE seu constare de violatione legis in decernendo relate ad actum Congregationis pro Religiosis et Institutis Saecularibus diei 28 februarii 1980, prot.n.3332/80".

AURELIUS Card. SABATTANI, Praefectus; BERNARDINUS Card. GANTIN
SILVIUS Card. ODDI; PETRUS Card. PALAZZINI; OPILIUS Card. ROSSI;
MARIUS ALOSIUS Card. CIAPPI; ALOSIUS Card. DADAGLIO;
D. SIMON Card. LOURDUSAMY; ROSALIUS J. Card. CASTILLO LARA;
EDUARDUS Card. GAGNON; ALPHONSUS Card. STICKLER, Ponens